

開州志

卷六

開州志卷之六

人物志

自史記變編先爲紀傳後來府州縣志皆仿之以志人物所以備國史之採擇也開州爲康叔遺封土大夫生於斯其宏勳偉伐懿德嘉言足以坊表當時風示來茲者後先輝映傳曰衛多君子不其然歟茲依通志例人以類分凡見於正史者悉載本傳其有實行可紀者以次列入至耆壽流寓方技仙釋武功諸志悉載之不可缺也因附於後志人物

名臣

漢

開州志

卷之六

人物 名臣

一

汲黯字長孺濮陽人也其先有寵於古之衛君至黯七世世爲卿大夫黯以父任孝景時爲太子洗馬以莊見憚孝景帝崩太子卽位黯爲謁者東越相攻上使黯往視之不至至吳而還報曰越人相攻固其俗然不足以辱天子之使河內失火延燒千餘家上使黯往視之還報曰家人失火屋比延燒不足憂也臣過河南河南貧人傷水旱萬餘家或父子相食臣謹以便宜持節發河南倉粟以賑貧民臣請歸節伏矯制之罪上賢而釋之遷爲滎陽令黯耻爲令病歸田里上聞乃召拜爲中大夫以數切諫不得久留內遷爲東海太守黯學黃老之言治官理民好清靜擇丞

史而任之其治責大指而已不苛小黯多病卧閨閣
內不出歲餘東海大治稱之上聞召以爲主爵都尉
列於九卿治務在無爲而已宏大體不拘文法黯爲
人性倨少禮面折不能容人之過合已者善待之不
合已者不能忍見士亦以此不附焉然好學游俠任
氣節內行修潔好直諫數犯主之顏色常慕傳柏袁
盎之爲人也善灌夫鄭當時及宗正劉棄亦以數直
諫不得久居位當是時太后弟武安侯蚡爲丞相中
二千石來拜謁蚡不爲禮然黯見蚡未嘗拜常揖之
天子方招文學儒者上曰吾欲云云黯對曰陛下內
多欲而外施仁義奈何欲效唐虞之治乎上默然怒

開州志

卷之六

人物名臣

二

變色而罷朝公卿皆爲黯懼上退謂左右曰甚矣汲
黯之戇也羣臣或數黯黯曰天子置公卿輔弼之臣
寧令從諛承意陷主於不義乎且已在其位縱愛身
奈辱朝廷何黯多病病且滿三月上常賜告者數終
不愈最後病莊助爲請告上曰汲黯何如人哉助曰
使黯任職居官無以踰人然至其輔少主守城深堅
招之不來麾之不去雖自謂賁育亦不能奪之矣士
曰然古有社稷之臣至如黯近之矣大將軍青侍中
上踞廁而視之丞相宏燕見上或時不冠至如黯見
上不冠不見也上嘗坐武帳中黯前奏事上不冠望
見黯避帳中使人可其奏其見敬禮如此張湯方以

更定律令爲廷尉黯數質責湯於上前曰公爲正卿上不能褒先帝之功業下不能抑天下之邪心安國富民使囹圄空虛二者無一焉非苦就行放析就功何乃取高皇帝約束紛更之爲公以此無種矣黯時與湯論議湯辯常在文深小苛黯伉厲守高不能屈忿發罵曰天下謂刀筆吏不可以爲公卿果然必湯也令天下重足而立側目而視矣是時漢方征匈奴招懷四夷黯務少事上間常言與胡和親無起兵上方向儒術尊公孫宏及事益多吏民巧弄上分別文法湯等數奏決讞以幸而黯常毀儒面觸宏等徒懷詐飾智以阿人主取容而刀筆吏專深文巧詆陷人

於罪使不得反其真以勝爲功上愈益貴宏湯宏湯
深心疾黯唯天子亦不說也欲誅之以事宏爲丞相
乃言上曰右內史界部中多貴人宗室難治非素重
臣不能任請徙黯爲右內史爲右內史數歲官事不
廢大將軍青旣益尊姊爲皇后然黯與亢禮人或說
黯曰自天子欲羣臣下大將軍大將軍尊重益貴君
不可以不拜黯曰夫以大將軍有揖客反不重邪大
將軍聞愈賢黯數請問國家朝廷所疑遇黯過於平
生淮南王謀反憚黯曰好直諫守節死義難惑以非
至如說丞相宏如發蒙振落耳天子旣數征匈奴有
功黯之言益不用始黯列爲九卿而公孫宏張湯爲

小吏及宏湯稍益責與黯同位黯又非毀宏湯等已而宏至丞相封爲侯湯至御史大夫故黯時丞相史皆與黯同列或尊用過之黯褊心不能無少望見上前言曰陛下用羣臣如積薪耳後來者居上上默然有間黯罷上曰人果不可無學觀黯之言也日益甚居無何匈奴渾邪王率衆來降漢發車二千乘縣官無錢從民賞馬民或匿馬馬不具上怒欲斬長安令黯曰長安令無罪獨斬黯民乃肯出馬且匈奴畔其主而降漢漢徐以縣次傳之何至今天下騷動罷弊中國而以事夷狄之人乎上默然及渾邪至賈人與市者坐當死者五百餘人黯請問見高門曰夫匈奴

開州志

卷之六

人物名臣

四

攻當路塞絕和親中國興兵誅之死傷者不可勝計而費以巨萬百數臣愚以爲陛下得胡人皆以爲奴婢以賜從軍死事者家所鹵獲因予之以謝天下之苦塞百姓之心今縱不能渾邪率數萬之衆來降虛府庫賞賜發良民侍養譬若奉驕子愚民安知市買長安中物而文吏繩以爲闌出財物于邊關乎陛下縱不能得匈奴之資以謝天下又以微文殺無知者五百餘人是所謂庇其葉而傷其枝者也臣竊爲陛下不取也上默然不許曰吾久不聞汲黯之言今又復妄發矣後數月黯坐小法會赦免官於是黯隱於田園居數年會更五銖錢民多盜鑄錢楚地尤甚上

以爲淮陽楚地之郊乃召拜黯爲淮陽太守黯伏謝不受印詔數彊予然後奉詔詔召見黯黯爲上泣曰臣自以爲填溝壑不復見陛下不意陛下復收用之臣常有狗馬病力不能任郡事臣願爲中郎出八禁闡補過拾遺臣之願也上曰君薄淮陽邪吾今召君矣顧淮陽吏民不相得吾徒得君之重卧而治之黯旣辭行過太行李息曰黯棄居郡不得與朝廷議也然御史大夫張湯智足以拒諫詐足以飾非務巧佞之語辯數之辭非肯正爲天下言專阿主意主意所不欲因而毀之主意所欲因而譽之好興事舞文法內懷詐以御主心外挾賊吏以爲威重公列九卿不

開州志

卷之六

人物名臣

五

早言之公與之俱受其僇矣息畏湯終不敢言黯居郡如故治淮陽政清後張湯果敗上聞黯與息言抵息罪令黯以諸侯相秩居淮陽七歲而卒卒後上以黯故官其弟汲仁至九卿子汲偃至諸侯相黯姑姊子司馬安亦少與黯爲太子洗馬安文深巧宦官四至九卿以河南太守卒昆弟以安故同時至二千石者十人濮陽段宏始事蓋侯信信任宏宏亦再至九卿然衛人仕者皆嚴憚汲黯出其下

史記本傳

索盧放字君陽東郡人也以尙書教授千餘人初署郡門下掾更始時使者督行郡國太守有事當就斬刑放前言曰今天下所以苦毒王氏歸心皇漢者實

以聖政寬仁故也而傳車所過未聞恩澤太守受誅
誠不敢言但恐天下惶懼各生疑變夫使功者不如
使過願以身代太守之命遂前就斬使者義而赦之
由是顯名建武六年徵爲洛陽令政有能名以病乞
身徙諫議大夫數納忠言後以疾去建武末復徵不
起光武使人輿之見於南宮雲臺賜穀二千斛遣歸
除子爲太子中庶子卒於家

後漢書
本傳

謝弼字輔鸞東郡濮陽人也中直方正爲鄉邑所宗
師建寧二年詔舉有道之士弼與東海陳敦元菟公
孫度俱對策皆除郎中時青蛇見前殿大風拔木詔
公卿以下陳得失弼上封事曰臣聞和氣應於有德

開州志

卷之六

人物名臣

六

妖異生乎失政上天告譴則王者思其愆政道或虧
則姦臣當其罰夫蛇者陰氣所生鱗者甲兵之符也
鴻範傳曰厥極弱時則有蛇龍之孽又熒惑守亢裴
回不去法有近臣謀亂發於左右不知陛下所與從
容帷幄之內親信者爲誰宜急斥黜以消天戒臣又
聞惟虺惟蛇女子之祥伏惟皇太后定策宮闈援立
聖明書云父子兄弟罪不相及竇氏之誅豈宜咎延
太后幽隔空宮愁感天心如有霧露之疾陛下當何
面目以見天下昔周襄王不能敬事其母戎狄遂至
交侵孝和皇帝不絕竇后之恩前世以爲美談禮爲
人後者爲之子今以桓帝爲父豈得不以太后爲母

哉援神契曰天子行孝四夷和平方今邊境日蹙兵革蜂起自非孝道何以濟之願陛下仰慕有虞蒸蒸之化俯思凱風慰母之念臣又聞爵賞之設必酬庸勲開國承家小人勿用今功臣久外未蒙爵秩阿母寵私乃享大封大風雨雹亦由於茲又故太傅陳蕃輔相陛下勤身王室夙夜匪懈而見陷羣邪一旦誅滅其爲酷濫駭動天下門生故吏並離徙錮蕃身已往人百何贖宜還其家屬解除禁網夫台宰重器國命所繼今之四公唯司空劉寵斷首善餘皆素餐致寇之人必有折足覆餗之凶可因災異並皆罷黜徵故司空王暢長樂少府李膺並居政事庶災變可

開州志

卷之六

人物名臣

七

消國祚惟永臣山藪頑闇未達國典策曰無有所隱敢不盡愚用忘諱忌伏惟陛下裁其誅罰左右惡其言出爲廣陵府丞去官歸家中常侍曹節從子紹爲東郡太守忿疾於弼遂以它罪收考掠按死獄中時人悼傷焉初平二年司隸校尉趙謙上訟弼忠節求報其怨乃收紹斬之

後漢書本傳

魏

杜友字季子魏正元中爲侍御史母邱儉之誅黨與七百餘人友治其獄惟舉首事十人餘皆奏散後仕晉歷冀州刺史河南尹子默字世元歷吏部郎衛尉

三國志裴松之註

晉

吳隱之字處默濮陽鄆城人魏侍中質六世孫也隱之美姿容善談論博涉文史以儒雅標名弱冠而介立有清操雖日晏歎菽不饗非其粟儋石無儲不取非其道年十餘丁父憂每號泣行人爲之流涕事母孝謹及其執喪哀毀過禮家貧無人鳴鼓每至哭臨之時恒有雙鶴警叫及祥練之夕復有羣鴈俱集時人咸以爲孝感所至嘗食鹹菹以其味旨掇而棄之與太常韓康伯鄰居康伯母殷浩之姊賢明婦人也每聞隱之哭聲輟殮投筯爲之悲泣旣而謂康伯曰汝若居銓衡當舉如此輩人及康伯爲吏部尚書隱

開州志

卷之六

人物名臣

八

之遂階清級解褐補國功曹轉參征虜軍事兄坦之爲袁真功曹真敗將及禍隱之詣桓溫乞代兄命溫矜而釋之遂爲溫所知賞拜奉朝請尚書郎累遷晉陵太守在郡清儉妻自負薪入爲中書侍郎國子博士太子右衛率轉散騎常侍領著作郎孝武帝欲用爲黃門郎以隱之貌類簡文帝乃止尋守廷尉祕書監御史中丞領著作如故左衛將軍雖居清顯祿賜皆班親族冬月無被嘗澣衣乃披絮勤苦同於貧庶廣州包帶山海珍異所出一篋之寶可資數世然多瘴疫人情憚焉唯貧窶不能自立者求補長史故前後刺史皆多黷貨朝廷欲革嶺南之弊隆安中以隱

之爲龍驤將軍廣州刺史假節領平越中郎將未至州二十里地名石門有水曰貪泉飲者懷無厭之欲隱之既至語其親人曰不見可欲使心不亂越崖喪清吾知之矣乃至泉所酌而飲之因賦詩曰古人云此水一軟懷千金試使夷齊飲終當不易心及在州清操踰厲常食不過菜及乾魚而已帷帳器服皆付外庫時人頗謂其矯然亦始終不易帳下人進魚每剔去骨存肉隱之覺其用意罰而黜焉元興初詔曰夫孝行篤於閨門清節厲乎風霜實立人之所難而君子之美致也龍驤將軍廣州刺史吳隱之孝友過人祿均九族菲已絜素儉愈魚殮夫處可欲之地而

開州志

卷之六

人物名臣

九

能不改其操饗惟錯之富而家人不易其服革奢務嗇南域改觀朕有嘉焉可進號前將軍賜錢五十萬穀千斛及盧循寇南海隱之率厲將士固守彌時長子曠之戰歿循攻擊百有餘日踰城放火焚燒三千餘家死者萬餘人城遂陷隱之攜家累出欲奔還都爲循所得循表朝廷以隱之黨附桓元宜加裁戮詔不許劉裕與循書令遣隱還久方得反歸舟之日裝無餘資及至數畝小宅籬垣仄陋內外茅屋六間不容妻子劉裕錫車牛更爲起宅固辭尋拜度支尚書太常以竹篷爲屏風坐無氍席後遷中領軍清儉不革每月初得祿裁留身糧其餘悉分振親族家人績

紡以供朝夕時有困絕或并日而食身恒布衣不完
妻子不霑寸祿義熙八年請老致事優詔許之授光
祿大夫加金章紫綬賜錢十萬米三百斛九年卒追
贈左光祿大夫加散騎常侍隱之清操不渝屢被褒
飾致事及於身没常蒙優錫顯贈廉士以爲榮初隱
之爲奉朝請謝石請爲衛將軍主簿隱之將嫁女石
知其貧素遣女必當率薄乃令移厨帳助其經營使
者至方見婢牽犬賣之此外蕭然無辦後至自番禺
其妻劉氏齎沉香一斤隱之見之遂投於湖亭之水
子延之復厲清操爲鄱陽太守延之弟及子爲郡縣
者常以廉慎爲門法雖才學不逮隱之而孝悌絜敬

開州志

卷之六

人物名臣

十

猶爲不替

晉書本傳

唐

杜暹濮州濮陽人父承志武后時爲監察御史懷州
刺史李文暉爲人所告詔承志推驗無實文暉宗室
近屬也卒得罪承志貶爲方義令遷天官員外郎見
羅織獄興移疾去卒于家自高祖至暹五世同居暹
尤恭謹事繼母孝擢明經第補婺州叅軍秩滿歸吏
以紙萬番贖之暹爲受百番衆歎曰昔清吏受一大
錢何異哉爲鄭尉復以清節顯華州司馬楊孚公挺
人也每咨重暹會孚遷大理正暹適以累當坐孚曰
使若人得罪衆安勸孚以狀言執政繇是擢爲大理

評事開元四年以監察御史覆屯磧西會安西副都護郭虔瓘與西突厥可汗阿史那獻鎮守使劉遐慶更相爭詔暹卽按入突騎施帳究索左驗虜以金遺暹暹固辭左右曰公使絕域不可失戎心乃受焉陰埋幕下已出境乃移文畀取之突厥大驚度磧追不及去遷給事中以母喪解會安西都護張孝嵩遷太原尹或言暹往使安西虜伏其清今猶慕思乃奪服拜黃門侍郎兼安西副大都護明年于闐王尉遲眺約突厥諸國叛暹覺其謀發兵計斬之支黨悉誅更立君長于闐遂安以功加光祿大夫守邊四年撫戎練士能自勤勵爲夷夏所樂十四年召同中書門下

開州志

卷之六

人物名臣

十一

平章事遣中使往迎謁見賜絹二百馬一匹第一區與李元紘輕重不得罷爲荊州都督長史歷魏州刺史太原尹帝幸北都進戶部尚書許扈蹕還復東幸以暹爲京留守暹率當番衛士繕三官浚池督役不少懈帝聞嘉之數賜書褒勞進禮部尚書封魏縣侯二十八年卒贈尚書右丞相遣使護喪禁中出絹三百匹賜之太常諡曰貞肅右司員外郎劉同昇等以暹行忠孝諡有未盡博士裴總謂暹往以墨衰受命安西雖勤勞于國不得盡孝其子列訴帝更勅有司考定卒諡貞孝暹友愛撫異母弟昱甚厚其爲人少學術故當朝議論時時失淺薄然能以公清勤約自

將亶亶爲之自弱冠誓不通親友獻遺以終身既卒尚書省及故吏致賻其子孝友一不受以行暹素志

云新唐書本傳

杜鴻漸字之選父鵬舉與盧藏用隱白鹿山以母疾與崔沔同授醫蘭陵蕭亮遂窮其術厯右拾遺玄宗東行河因游畋上賦以風終安州刺史鴻漸第進士解褐延王府參軍安思順表爲朔方判官祿山亂皇太子按軍平涼未知所適議出蕭關趣豐安鴻漸與六城水運使魏少游節度判官崔漪支度判官盧簡金關內鹽池判官李涵謀曰胡羯亂常二京覆沒太子治兵平涼然散地難恃也今朔方制勝之會若奉

開州志

卷之六

人物名臣

十二

迎太子西詔河隴北結回紇回紇固與國收其勁騎與大兵合鼓而南雪社稷之耻不亦易乎卽具上兵馬招輯之勢且錄軍資器械儲廩凡最使涵詣平涼見太子太子大悅會裴冕至自河西亦勸之朔方而鴻漸漪至白草頓迎謁說曰朔方天下勁兵靈州用武地今回紇請和吐蕃結附天下列城堅守以待王命縱爲賊據日夜望官軍以圖收復殿下治兵長驅逆胡不足滅也太子喜曰靈武我之關中卿乃吾蕭何也旣至靈武鴻漸卽與冕等勸卽皇帝位以係中外望六請見聽鴻漸明習朝章採舊儀設壇壝城南先一日草其儀上之太子曰聖皇在遠寇逆方結宜罷

壇場它如奏太子卽位是爲肅宗授鴻漸兵部郎中
知中書舍人事俄爲武部侍郎遷河西節度使兩京
平又節度荆南乾元二年襄州大將康楚元等反刺
史王政脫身走楚元僞稱南楚霸王因襲荊州鴻漸
棄城遁人皆南奔爭舟溺死者甚衆澧朗復郢等州
聞鴻漸出皆竄伏山谷俄而商州刺史韋倫平其亂
久之乃召鴻漸爲尙書右丞太常卿充禮儀使泰建
二陵制度皆鴻漸綜正以優封衛國公又建言周官
凶荒殺禮今承大亂民人夷殘其婚葬鹵簿非於國
有大功及二等以上親皆不許給詔可代宗廣德二
年以兵部侍郎同中書門下平章事尋進中書侍郎

開州志

卷之六

人物名臣

十三

崔旰殺郭英乂據成都邛州牙將柏貞節瀘州牙將
楊子琳劍州牙將李昌巖以兵討旰蜀劍大亂命鴻
漸以宰相兼成都尹山南西道劍南東川副元帥劍
南西川節度副大使往鎮撫之鴻漸性恆怯無它遠
畧而晚節溺浮圖道畏殺戮及逾劍門懲艾張獻誠
敗且憚旰雄武先許以不死旣見禮遇之不敢加譙
責反委以政曰與從事杜亞楊炎縱酒高會因薦旰
爲成都尹而授貞節邛州刺史子琳瀘州刺史各罷
兵乃請入朝許之及見帝盛言旰威畧可任宜爲留
後獻寶器五牀羅錦十五牀麝臍五石復輔政議者
疾其長亂進門下侍郎大厯三年兼東都留守河南

淮西山南東道副元帥辭疾不行又讓山南劍南副
元帥聽之四年疾甚辭宰相罷三日卒年六十一贈
太尉諡曰文憲鴻漸自蜀還食千僧以爲有報縉紳
效之病甚令僧剔頂髮遺命依浮圖葬不爲封樹

新唐

書本傳

吳湊章敬皇后弟也繇布衣與兄淑一日賜官封皆
等而湊畏太盛乞解太子詹事換檢校賓客兼家令
累進左金吾衛大將軍湊才敏銳而謙畏自將帝數
顧訪尤見委信是時令狐彰田神功等繼没其下乘
喪挾兵輒偃蹇搖亂湊持節至汴滑委悉慰說裁所
欲爲奏各盡其情亦度朝廷可行者故軍中驩附帝

開州志

卷之六

人物名臣

十四

才其爲重之元載當國久悞狀曰肆帝陰欲誅未發
也顧左右無可與計卽召湊圖之俄而收載賜死於
是王縉楊炎王昂韓會包佶等皆當坐湊建言法有
首從從不應死一用極刑虧德傷仁縉等繇是得減
死丁後母喪解職旣除拜右衛將軍德宗初出爲福
建觀察使政勤清美譽四騰與宰相竇參有憾參數
加短毀又言湊風痺不良趨走帝召還驗其疾非是
繇是不直參擢湊陝虢觀察使代李翼翼參黨也宣
武劉元佐死以湊檢校兵部尚書領節度使馳代未
至汴軍亂立元佐子士寧帝欲遣兵內湊而參請授
士寧以沮湊還爲右金吾衛大將軍貞元十四年夏

大旱穀貴人流亡帝以過京兆尹韓臯罷之卽召湊代臯已謝督視事明日詔乃下湊爲人彊力劬儉瞿瞿未嘗擾民上下愛向京師苦宮市彊估取物而有司附媚中宮率阿從無敢爭湊見便殿因言中人所市不便宵民徒紛紛流議宮中所須責臣可辦若不欲外吏與聞禁中事宜料中官高年謹信者爲宮市令平賈和售以息衆譴又言掌閑驥飛龍內園芙蓉園禁兵諸司雜供役手資課太繁宜有蠲省帝輒順可初府中易湊責戚子不便簿領每有疑獄時其將出則遮湊取決幸倉卒得容欺湊叩鞍一視凡指擿盡中其弊初無留思衆畏服不意湊精裁遣如此

開州志

卷之六

人物名臣

十五

僚史非大過不榜責召至廷詰服原去其下轉相訓勗舉無稽事文敬太子義章公主仍薨帝悼念厚葬之車土治墳農事廢湊候帝間徐言極爭不避或勸論事宜簡約不爾爲上厭苦湊曰上明睿憂勞四海不以愛所鍾而疲民以逞也顧左右鉗噤自安耳若反復啟寤幸一聽之則民受賜爲不少橋舌阿旨固善有如窮民上訴叵云罪何以能進兼兵部尙書及屬病門不內醫巫不嘗藥家人泣請對曰吾以庸謹起田畝位三品顯仕四十年年七十尙何求自古外戚令終者可數吾得以天年歸侍先人地下足矣帝知之詔侍醫敦進湯劑不獲已一飲之卒年七十一

贈尚書右僕射諡曰成先是街樾稀殘有司蒔榆其
空湊曰榆非人所蔭玩悉易以槐及槐成而湊已亡
行人指樹懷之唐興后族退居奉朝請者猶以事失
職而湊歷任中外未嘗以罪過罷爲世外戚表云

新唐

傳書本

王栖霞濮州濮陽人安祿山反尙衡哀義兵哀賊署
牙將徇兗鄆諸縣下之進牙前總管賊將邢超然守
曹州乘城指顧栖霞曰彼可取也一矢殞之遂拔曹
州累授試金吾衛將軍袁晁亂浙東御史中丞袁倓
討之表爲偏將與賊戰日十餘遇生禽晁收州縣十
六授常州別駕浙西都知兵馬使時江介未定詔內

開州志

卷之六

人物名臣

十六

常侍馬口新以汴滑軍五千鎮之中人暴橫賊蕭廷
蘭乘衆怨逐日新刦其衆栖霞方游奕近郊賊脅取
之與圍蘇州栖霞乘賊怠挺身登城率城中兵出戰
賊衆大敗遷試金吾大將軍李靈耀反汴州浙西觀
察使李涵使提兵四千爲河南犄角有功李希烈陷
汴州也乘勝東畧次寧陵將襲宋州浙西節度使韓
滉使栖霞以彊弩三千涉水夜入寧陵希烈不之知
晨朝矢集帳前驚曰江淮弩士入矣遂不敢東貞元
初拜左龍武大將軍出爲鄜坊節度使十九年卒贈
尚書右僕射諡曰成栖霞性謹厚善騎射始將兵涉
寇境遇游騎環合乃規百步立表而射每射破的虜

相顧懼引去

新唐書本傳

王茂元栖曜子少好學德宗時上書自薦擢試校書郎改太子贊善大夫呂元膺留守東都署防禦判官淄青留邸卒謀亂元膺率兵圍之士無敢先者茂元取一人斬之衆乃進賊遂出奔累遷嶺南節度使蠻落安之家積財交煽權貴鄭注用事遷涇原節度使注敗悉出家貲餉兩軍得不誅封濮陽郡侯召爲將作監領陳許節度使又徙河陽討劉稹也李德裕以茂元兵寡詔王宰領陳許合義成兵援之以河陰所貯兵械內庫甲弓矢陌刀賜之會病以宰兼河陽行營攻討使卒贈司徒諡曰威

新唐書本傳

開州志

卷之六

人物名臣

十七

宋

陳爰字伯玉澶州臨河人進士及第歷溧陽樂城縣主簿遷大理寺丞監眞定府稅知金堂夏津二縣再遷太常博士轉運使盧士倫曹利用壻也怙勢聽獄不以直訟者不已付爰評決爰直之御史知雜韓億聞其事奏爲監察御史丁父喪哀毀墳木連理憂除遷殿中侍御史天聖五年祀南郊中外以爲丁謂復還爰上疏曰亂常肆逆將而必誅陰懷姦惡有殺無赦丁謂因緣險佞據竊公台賄賂包苴盈於私室威權請謁行彼公朝引巫師妖術厭魅宮闈易神寢龍岡冀消王氣今禋柴展禮渙汗推恩必慮謂潛輸琛

貨私結要權假息遐荒冀移善地李德裕止因朋黨不獲生還盧多遜曲事王藩卒無牽復請不原赦帝然之爲三司度支判官遷侍御史厯京西河東河北轉運副使三司戶部度支鹽鐵副使汴倉納糧納槩量不實操舟者坐亡失所載或杖背徒重役爰始奏選官監視謂之定計斗而積遷至尚書工部郎中卒

宋史本傳

張田字公載澶淵人登進士第知應天府司錄歐陽修薦其才通判廣信軍夏竦楊懷敏建策增七郡塘水詔通判集議田曰此非禦敵策也壞良田浸冢墓民被其害不爲便因奏疏極論調監郢州稅久之通

開州志

卷之六

人物名臣

十八

判冀州內侍張宗禮使經郡酣酒自恣守貳無敢白者田發其事詔配西陵灑掃攝度支判官袷享太廟又請自執政下差減資費唐介論其虧損上恩出知蘄州俄提點湖南刑獄介與司馬光又狀其傾險改知湖州徙廬州治有善迹移桂州異時蠻使朝貢假道與方伯抗禮田獨坐堂上使引入拜於庭而犒賄加腆土豪劉紀廬豹素爲邊患訖田去不敢肆京師禁兵來戍不習風土往往病於瘴癘田以兵法訓峒丁而奏罷戍或告交趾李日尊兵九萬謀襲特磨道諸將請益兵田曰交趾兵不滿三萬必其國有故張虛聲以嚇我耳諜旣得實果其兄弟內相殘懼邊將

乘之也宣州人魏利安負罪亡命西南龍蕃從其使入貢凡十反至是龍以烈來復從之田因其入謁詰責之梟其首欲並斬以烈叩頭流血請命田曰汝罪當死然事幸在新天子卽位赦前汝自從朝廷乞恩乃密請貸其死熙寧初加直龍圖閣知廣州廣舊無外郭民悉野處田始築東城環七里賦功五十萬兩旬而成初役人相驚以白虎夜出田迹知其僞召戒邏者曰今夕有白衣人出入林間者謹捕之如言而獲城既就東南微陷往視之暴卒年五十四田爲人伉直自喜好嫚罵氣陵其下故死無哀者然臨政以清女弟聘馬軍師王凱欲售珠犀于廣顧曰南海富

開州志

卷之六

人物名臣

十九

諸物但身爲市舶使不欲自汙爾作歛賢堂繪古昔清刺史像日夕師拜之蘇軾嘗讀其書以侔古廉吏

宋史本傳

明

李珏字廷重登宏治乙丑進士授長洲知縣長洲吳巨邑獄訟賦稅繁重珏少年精敏民稱神君時劉瑾專政因勘魏國公田忤瑾誣奏被逮邑人爭釀金幣饋瑾謀脫之珏聞正色曰予爲民獲罪若輩復斂民以脫是益之罪也吾知有義而已固却之事竟得白三年陞刑部主事歷員外郎中出守東昌遷山東副使備兵徐州時河南巨盜王鏜聚衆數萬流劫遠近

珏調集精銳掩襲賊巢首惡火焚死餘黨解散奏聞
賜金幣陞浙江左叅政轉山西按察使晉俗民好訟
有數年弗解者珏片言決之自是獄無滯囚晉僉都
御史巡撫甘肅以誤按大獄謫戍潯州遇赦還會邊
警至太原廷薦起珏以原官提督鴈門諸關巡撫山
西至則增太原崑嵐代州平陽四叅將修邊墻延袤
八百餘里敵知有備不敢犯以疾乞歸再起撫遼東
築屯堡添士卒選民壯爲精兵尋擢大理寺卿入朝
三月致仕歸卒賜祭葬祀鄉賢

錄舊志

王縉字邃伯父溥爲陽曲丞性狷介忤上官歸縉少
穎悟登宏治乙丑進士授戶部主事歷員外郎時劉

開州志

卷之六

人物名臣

二十

瑾竊政羣閹多所請託縉悉格不行尋出守衛輝遷
湖廣按察副使適世宗入繼大統宦官谷大用迎駕
至安陸驕恣甚強縉長跪縉不屈大呼奏行在上遣
中官慰諭之改河南副使以擒礦寇功陞山西叅政
晉故患盜縉至策勵將士討平之進山西行太僕寺
卿以疾告歸起四川布政使擢副都御史巡撫江西
民健訟縉務加裁抑鄉宦之在要地者絕不與通入
爲大理卿以忤旨左遷山東左叅議卒於官縉居官
所至有聲績一以直道不與世浮沉宦遊三十年蕭
然如寒素痛兄早逝舉先世遺業盡畀兄子鄉人賢

之祀鄉賢

錄舊志

王崇慶字德徵正德戊辰進士授戶部主事時劉瑾既得罪下獄未誅崇慶疏斥其害政誤國流毒縉紳乞卽正典刑主事宿進以直諫予杖崇慶爭之武宗怒謫壽康驛丞踰年判沁州旋同知登州陞戶部員外轉郎中辛巳擢江西按察司僉事嘉靖初上新政十三事皆見嘉納又以豹房回子余永以邪術惑武宗及陝西總兵李隆陰主叛軍殺都御史許銘上言不誅余永恐妖淫踵于後來不誅李隆恐威令損于西夏識者躉之癸未改山西叅議乞終養起河南副使再乞終養家居十五年丁母艱服闋卽家起陝西行太僕寺擢四川布政使以平白草番功賜銀幣擢

開州志

卷之六

人物名臣

二十一

南京太常卿陞禮部侍郎累官南京吏部尙書卒崇慶性廉介不可干以私有孝行奉母色養倍至前後告歸依膝下者凡二十年爲文峻潔有古風所著有五經心義山海經釋義元城語錄解端溪文集行世手輯州乘簡核有體州之學者至今稱端溪先生祀

鄉賢

錄舊志

趙廷瑞字信臣生而敏悟多懿行成進士選庶吉士歷刑科都給事中時張璁因議禮得寵以詹事擢兵部左侍郎廷瑞上章論璁進士六年遽擢貳本兵恐啟奔競又論李琮爲江彬爪牙齊佐爲錢寧羽翼張仁以么麼賤伶潛通逆藩及太監韋霽等奸狀一時

直亮之聲震中外旋陞右通政己亥用廷薦擢副都御史巡撫陝西以保障功晉兵部左侍郎在鎮三年屢奏膚功賜勅嘉獎並資金幣陞南京戶部尚書調北京兵部尚書以勤敏受知世宗加太子少保因疾乞歸卒祀鄉賢

錄舊志

史褒善字文直號沱村嘉靖壬辰進士授行人奉命董韓王葬事瀕行王贈以金幣悉辭不受考選御史補陝西道巡按遼東時遼陽新變人情洶洶褒善恩威並立民心帖然辨疑獄釋重辟三十餘名勸農興學邊宇底寧遼舊無志褒善與巡撫開館延名儒探稽往牒勒爲完書旋以憂歸服闋補浙江道復按楚

開州志

卷之六

人物名臣

二十二

有平麻陽盜功以論陵璫恣橫反爲所噬謫判滁州起南京國子監博士陞南京吏部主事歷員外郎中擢江西按察副使備兵饒州轉浙江叅政晉河南右布政適南方倭寇猖獗擢僉都御史提督操江褒善兼程赴任卽具疏云國家財賦仰給東南而留都根本重地視江淮一帶爲尤重譬之居室留都堂奧也鎮江儀徵門戶也靖江海口則藩籬也欲堂奧尊嚴則當謹門戶欲守門戶則當固藩籬此居重馭輕之勢也操江雖奉勅管轄江之南北一有徵調則動輒掣肘有司徵解則牽於觀望事難措辦皆由職守未明所致也今請巡撫專管海防操江專管江防操江

衙門原無額設錢糧並乞措置以便安攘命下兵部
議行於是選軍將申紀律團練兵勇改造戰船士皆
奮勵復建議請於沿江一帶設兵備副使三員指揮
把總三員兵備一駐太平一駐鎮江一駐通州各以
把總一員領兵千餘副之至瓜洲重鎮則委揚州同
知領民兵七百名以爲內地之防得旨允行尋海上
倭寇糾合團賊三千餘大肆焚劫官兵不能禦獨江
關一帶兵完守固賊不敢入上嘉賚之褒善復條上
江防六事一曰廣求才以充將選二曰嚴法程以稽
團練三曰請軍餉以護重地四曰選庶職以備任使
五曰築鎮城以固江關六曰稽廬佃以絕奸細上皆

開州志

卷之六

人物名臣

二十三

嘉納時越獄海寇徐碧溪欲潛搆倭逆深入褒善督
兵三路追擒之海倭久據柘林諸巢欲搶京口瓜洲
等鎮居民皆思竄避瓜洲閘壩相次乃糧運咽喉無
城郭以爲恃褒善倡議建城爲防守計又揚州如臯
海門泰興舊皆無城褒善亦請建城如瓜洲倭寇屢
掠京口移攻瓜洲海門泰興江陰等處褒善相機設
伏斬獲甚衆賊復欲犯留都褒善命指揮韓天祥駕
福船以火攻之時西北風急海船截於下流千戶張
祚領兵從旁夾攻賊果遁留都賴以無恐方欲添兵
督將掃除巢穴乃爲言官劾奏歸尋追叙防江功陞
大理卿致仕居紅翠山莊以疾卒有奏議詩文集若

千卷藏於家

朱爵字仲修萬曆丙戌進士任荏平知縣召爲吏科給事中嘗論時政闕失因疏閣臣趙志臯張位寢閣壅蔽罪不報尋切諫三王並封且論救朱維京王如堅等復劾志臯位私同年羅萬化爲吏部坐謫山西按察知事卒於家天啟中贈太僕少卿祀鄉賢

明史本傳

董漢儒字學舒萬曆十七年進士授河南府推官入爲戶部主事疏陳減織造裁冒濫諸事且曰邇來九閩三殿間惟聞縱酒淫刑黷貨時事可憂不止國計日絀已也不報朝鮮再用兵以郎中出理餉務尋遷山東僉事進副使歷湖廣左右布政使所在有聲四

開州志

卷之六

人物名臣

二十四

十年就拜右副都御史巡撫其地帝賜福王莊田責湖廣四千四百餘頃漢儒以無所得田請歲輸萬金代租不聽楚宗五十餘人訐假王事獲罪囚十載漢儒力言王假也請釋繫者又爲滿朝薦卞孔時等乞宥俱不報憂歸光宗立召拜工部右侍郎旋改兵部總督宣府大同山西軍務天啟改元遼陽失簡精卒二千八衛詔褒之明年秋以左侍郎協理戎政未上擢兵部尚書時遼地盡亡漢儒請逮治諸降將劉世勛等二十九人家屬立誅逃將蔡汝賢等報可毛文龍居海外屢以虛言誑中朝登萊巡撫袁可立每代爲奏請漢儒言文龍計畫疎虛聲未可長恃又請誅

逃將管大藩張思任孟淑孔等語甚切帝命逮治思任等而大藩等卒置不問諸鎮援遼軍多逃逸有出塞投插部者漢儒請捕獲立誅同伍相擒捕者重賞且給餉以時則逃者自少帝亦嘉納奄人王體乾宋晉魏忠賢等十二人有舊勞命所廕錦衣官皆子世襲漢儒據祖制力爭帝不從給事中程註御史汪泗論等合疏諫給事中朱大典周之綱御史宋師襄胡良機特疏繼之卒不納漢儒旋以母喪歸後忠賢大橫漢儒服闋遂不召追叙甘肅功卽家進太子太保廕子錦衣百戶卒贈少保諡肅敏

明史本傳

政事

開州志

卷之六

人物 政事

二十五

元

朱文英至元四年知平鄉縣下車之日園吏以常例供菜茹文英曰昔公儀拔葵且云不可奪園夫之利况受其供乎遣之嘗謂治民如牧羊豺狼不驅欲羊之蕃息不亦難乎乃罷革里正行用信牌催納月課契外一切無征七年奉命開南和之澧河將通漕運文英相視地形曰此濡濕之地農事方殷安可奪有用之功以興無益之務乎言之總府遂罷役

畿輔通志

明

紀著字周道肆志好學於書無所不窺受業于伯顏師聖所得益深元季就試山東得盤陽路學錄再就

試陝西得濮陽尹卽鄉邑也會盜起率鄉人隱居避
難明初郡縣皆立學爭禮著爲師洪武十四年詔舉
遺賢州有司首以著應詔旣至被顧問多稱旨授平
陽教諭已而遣使馳驛召之命試都察院右僉都御
史時著年已七十上政事之暇數召入內殿講論治
道著具以所得對上輒嘉悅居二年卒曾孫振性穎
敏登永樂戊戌進士厯兗州濟寧武學教授擢吏部
考功員外宦遊三十餘年囊橐蕭然人競稱之
王範字子儀號靜軒天順庚辰進士選庶吉士改授
刑部主事厯陞郎中奉詔按松潘獄與中貴忤左遷
知東平州教民樹藝俗用殷阜丁內艱服闋詣京師

開州志

卷之六

人物 政事

二十六

東平士民數百赴吏部乞範復任二年擢守福建延
平東平之民送者涕泣滿道任延平九年民安其政
轉本省叅政宏治初上杭守禦千戶劉鐸聚衆數萬
橫行江閩間範單騎馳至賊所諭以禍福宣朝廷恩
信賊解散執首惡歸捷聞賜金幣勞之尋轉湖廣布
政使省會城臨漢江水勢奔激岸時崩圯修築罔有
成功範易木以石費雖倍而功則久又于望山門對
渡處建浮橋一所行人便之在東平時亦嘗建橋于
孝馳里民至今呼爲王公橋年六旬卽告歸卒於家
子縉紀縉字朝章性倜儻正德丁卯舉亞魁累試春
官不第選授定遠令邑衝且劇縉敏幹有爲值歲飢

賑給全活民無算再令延長延長窮僻而供役等他
邑縉上疾苦狀拂上官意解任歸紀字朝憲登正德
庚辰進士任霍邱知縣白冤獄全活數百人興學舉
廢未半載政聲翕然調吳江會歲飢詔所司亟議賑
時待哺者嗷嗷多壅滯紀令人給片楮詣主者爲左
驗故不勞而事理隣邑多仿之毀淫祠千百所以薦
入爲戶部主事陞員外郎以疾卒

劉守達字應徵幼穎異有神童稱弱冠成進士授青
州府推官有富民繫獄以金獻守達却之竟抵于法
以侮璫落職起婺源丞陞餘姚知縣有毆殺婦人者
潛易其屍累勘不服守達檢之曰此非原屍肌膚雖

開州志

卷之六

人物 政事

二十七

腐髮辮尙存必處子屍也一訊卽服衆稱神明遷嘉
興同知陞南京工部郎中以母老乞終養家居四十
餘年足不履公庭著家訓子孫守之內外肅然
孫經字引之年十四遊郡庠博通經史知州李嘉祥
每見必稱之曰此公輔器也正德戊辰成進士授戶
部主事改吏部陞員外冢宰楊一清與論事必深許
可擢山西僉事備兵雲中時藩王驕橫諸司莫敢誰
何經一切裁以法軍民稱慶丁內艱服除補陝西叅
議會年飢經奏蠲其賦邊人賴焉轉按察副使尋告
歸嘉靖六年春大飢出粟濟飢者數百人經平生雅
好賓客樂道人善爲詩文雄渾俊健有遺稿藏于家

王溱字濟之正德辛未進士知沁水縣徵拜侍御史
風裁峻整彈劾不避權貴時號真御史出守平陽調
南康又改河東抗疏自劾歸所著有玉溪詩集王崇
慶謂其不妄交不黨惡不隱賢而又不雷同附和以
浮沉于世故其勲志亦不大究于時後以疾卒於家
君子惜之

孫聰字用晦正德辛未進士知合肥縣役繁民困聰
拊循節省民甚安之入爲戶部主事管天津倉值武
宗南巡過天津扈從內侍官軍芻餉咸取給焉聰調
度得宜不爲羣小所虐出守平涼多惠政後守慶陽
有孀婦爲惡少所窘弗從鬻其背有痕逸去痕復乃

開州志

卷之六

人物 政事

二十八

歸聰盡執里中惡少鞫問無應者乃各醉以酒一人
背有癍如赭卽婦鬻處也惶恐伏辜時稱神君年荒
發官粟賑救旁及他郡亦來就食全活以萬計遷四
川按察副使致仕歸性篤友愛兄弟早世遺孤皆賴
其成立姪國亦登進士歷官山西副使著廉直聲
王世爵字君列別號澶西居士正德庚午領鄉薦庚
辰捷南宮時武宗南巡未廷試辛巳世宗卽位御西
角門策試世爵觀政兵部以臺諫缺員授南京監察
御史巡視留都十三門散軍衛花布冬衣繼管屯田
戊子春疏陳時政八事言甚切直觸忤權倖外轉廣
西僉事分巡蒼梧庚寅丁內艱甲午起山西副使備

兵雲中適有寇警世爵與帥臣合謀滅之捷聞賜銀幣加俸一級戊戌調陝西副使撫治西寧會兵部考績以前在大同建陽和天城二堡功復賜金幣加俸一級尋轉遼東苑馬寺卿陞江西右叅政居二年告歸在家杜門謝客蕭然塵外二十餘年撫按交章騰薦堅不起時論高之

吉澄字靜甫嘉靖甲辰進士授雒南知縣輕徭薄賦恤民困苦以治行擢御史彈壓輦轂人比兩鮑時權相當國獨持風裁不少阿是以八年不調以素爲世宗所知亦不能中也累遷都御史巡撫遼東修路臺築墻堡選將運籌大有斬獲功後以疾卒於家子大

開州志

卷之六

人物 政事

二十九

同嘉靖壬戌進士授行人累官湖廣叅議清盜源植葦利民甚德之遷睢陳兵備副使救災弭患四境帖然聞父疾請告遄歸父卒以祖母老陳情終養人以爲忠孝世篤云

魏域字子封天性方潔爲時所重舉于鄉任祁門知縣有廉幹稱節省里甲裁革冗費一塵不能干以守正爲忌者所中拂衣歸家居三十餘年卒祁門祀之名宦

史燦字晦甫性介而和早受學于楊椒山先生遂領鄉薦任富平令修建學宮多善政富平祀之名宦後調新蔡卒

王以道字子修以選貢授城武知縣築堤捍水災民
舊苦漁稅力請蠲民困始蘇尋調知南召勤于吏治
訟獄無停壅舉孝子旌烈婦以勵風俗修縣東水利
塘田資灌溉民咸歌頌之以親老解官歸建愛日堂
以奉親遠近慕焉

王祺字兆吉萬曆癸未進士任刑部主事多所平反
出判河東鹽課厯大理評事轉國子監丞識拔英俊以
直道不諧于時告歸卒于家

邢琦字用蘊幼有至性穎悟嗜學萬曆甲午領鄉薦
爲蓬萊知縣邑故濱海地稱磽瘠時以軍興積逋賦
數千爲民困琦刻意清釐士民便之遷淮安通判有

開州志

卷之六

人物 政事

三十

治河功以言忤鄉貴竟免官未幾起漢陽推官執法
無枉謝絕請托漢陽人稱爲邢鐵面厯南京工部郎
中出守浙江嚴州嚴歲輸上供絹民甚苦之琦力爲
請豁民累永除性戇直復爲要津所齟齬遂歸立孝
友社以教其家復建義塾里中貧而志學者賴以成
立卒祀鄉賢蓬萊祀之名宦

王璣字用齊萬曆己未進士授寧國知縣境多山藪
榛莽不治璣招徠三百餘戶開墾山塘二千餘畝調
宣城值民與鄉紳某爲難聚衆數千人訴之于御史
臺御史諭之不解璣至曲爲開諭示以禍福民始散
御史喜其能特疏薦于朝授戶部主事轉郎中督餉

山海關以積勞成疾卒于官贈太僕少卿賜祭葬所
著有植槐堂文稿藏于家

國朝

王懷字仲愛性豪宕不羈以貢入太學崇禎丙子中
副車第一授襄垣令邑多豪右素難治懷悉繩以法
無敢犯者以卓異徵會闖賊陷京師入南都試監察
御史彈劾有直聲

國朝定鼎以招撫淮安功授蘇松常鎮糧儲道爲開國首
運擢僉都御史巡撫安徽謝病歸懷生平慷慨好任
俠喜施與州人食其德者甚衆

張抑之字元白登天啟乙丑進士授戶部主事歷陞
開州志

卷之六

人物 政事

三十一

郎中出守大同廉介自持多善政卽遷大同兵備副
使告歸

國朝順治初用薦起山東副使加意與民休息淡素醇謹
一如寒士謝病歸行李蕭然

趙奠麗字建先才敏捷善屬文登順治乙未進士任
武陟知縣邑素繁劇民刁健訟奠麗長才肆應縣大
治擢戶部主事管右翼倉摧龍江關關在江寧郭外
駐防大將軍兵馬草豆皆取辦焉輸給無少稽以中
寒疾卒於官奠麗慷慨有大畧未竟厥施時論惜之
安九埏盆城庄人幼穎悟登順治乙未進士授浙江
德清知縣蒞任僅二月卽丁祖母憂去之日德清士

民作頌政詩百餘篇送之服闋後歷署廣西來賓北流等縣多善政後家居同輯州乘論斷有識人多稱之

常時泰字交甫順治己亥進士授思南司李持獄多所平反且捐俸修城檄服酉陽纂省志思南人傳頌之嗣缺裁解任歸行李蕭然旋里後遂不復出嘗買嫠婦舍既立契而嫠婦撫舍哭時泰哀之蠲直焚券還其舍出經業師宋某墓側遙下車步而過其制行類如此時泰善古詩兼善古文辭著作甚多藏於家常晉錫字昭自中崇禎己卯副車

國朝定鼎選授河南新蔡知縣時天下初定負固者猶列

開州志

卷之六

人物 政事

三十二

寨自雄晉錫下車諭以大義盡解散有巨寇漏網以千金丐命晉錫不許卒抵於法尤加意學校集文士考課優其廩餼蒞任僅期月循聲大著以直忤繡衣

使者拂衣歸

以上錄舊志

靳文謨字淇園靳家寨人康熙癸酉進士任廣東新安知縣邑故濱海屢經遷復民多逋逃賦稅缺額文謨抵任悉心撫字三年民始復業行取試御史山東飢疏請賑濟又請詳慎刑獄俱下部議行歷巡東城南城輦轂肅清掌河南道巡視福建鹽政以疾卒郭從善八公橋庄人天性純篤少失怙家貧負薪執卷且耕且讀康熙乙酉舉於鄉因益肆力於學博覽

載籍旁通百家雍正癸卯

詔舉賢良方正知州以從善應會從善守制未就甲寅選授
浙江慶元知縣抵任謂其父老曰人當致仕之年我
爲筮仕之日三年考績我當歸矣因力除夙弊凡利
與民者興舉之勒石五都以垂不朽又革陋俗十三
條教化大行三年知府薦爲十縣賢員第一時境內
被水勘災輕重捐俸賑濟全活者甚衆所理詞訟判
斷明決案無留牘以勞得疾告歸所著有務實齋大
小題文詩經舉子業及策論數百篇藏於家

王星字輝九少讀書能文累試不售乃兼習騎射入
武庠康熙乙酉丙戌連捷進士授陝西涼州衛守備

開州志

卷之六

人物 政事

三十三

涼地番民雜處嘗相水火星撫綏調劑兩得其平涼
舊有弊政訟者大事輸官銀五金小事二金乃納其
狀星曰如是則貧有冤無可訴矣亟革之爲民治溝
渠教稼穡數年治績赫然涼民感其德立生祠祀之
嗣衛所缺裁解任以前官宿欠被累寄居古寺十有
三年始得歸卒於家所著有塞翁吟一卷傳於世
孫念祖字景型州南艾家庄人也家貧嗜學康熙壬
午舉於鄉選河南正陽知縣抵任不匝月百廢俱興
崇學校減徭役士民歌頌之後改授任邱司鐸時進
諸生於庭訓以先德行而後文藝一時執經問字者
履滿戶外迄今兩邑之人猶思慕焉

王圯康熙丁酉舉人任山東棲霞知縣因直忤上官改授新樂教諭去任時棲霞士民作十好歌以美之所著有培槐堂大中講義行世

宋暉字曰章性純孝登雍正甲辰進士任貴州永從知縣捐俸濟民設學教士爲民造衣袴變易蠻風以疾卒於官永從人爲立祠祀之

郟政字懋官以選貢授河南陝州判官陝州地僻民樸野政勸學造士選才質俊秀者給廩餼嚴爲課程人文以興性慈惠對民無亢厲語每出婦孺夾道爭迎之其無知犯法者必告諭再三始置之刑無少濫
歷署鎮平永寧盧氏縣事縣多奸盜設法懲治盜爲

開州志

卷之六

人物 政事

三十四

歛迹旋丁內艱服闋起補廣東連州州判歷署樂昌連山清遠縣事政簡刑清胥吏歸農者過半出入以數役從所至之處無不樂其平易以疾卒於官

王興槿字道木歲貢生性至孝父病每夜禱于天求以身代後選授威縣訓導除學中夙弊數十條勒石以垂永久生員有陳正心者以父故除名興槿知其無罪力白學使者還其衣頂人甚稱之

忠節

唐

吳淑章敬皇后之弟代宗立詔贈后祖神泉爲司徒父令珪太尉擢叔父令瑤太子家令濮陽郡公令瑜

太子諭德濟陽郡公湊太子詹事濮陽郡公並開府儀同三司令瑤兄弟故爲縣令郎將矣而淑用盛王府叅軍進俄遷鴻臚少卿金吾將軍建中初遷大將軍淑循循有禮讓無倨氣矜色見重朝廷時以爲材當所位不自戚屬者朱泚反盧杞白志貞皆謂泚有功不宜首難得大臣一人持節慰曉惡且悛德宗顧左右無敢行淑曰陛下不以臣亡能願至賊中諭天子至意帝大悅淑退謂人曰吾知死無益而決見賊者人臣食祿死其難所也方危時安得自計且不使陛下恨下無犯難者即曰齎詔見泚具道帝待以不疑者而泚業僭逆故留淑客省不遣卒被害帝悲梗

開州志

卷之六

人物 忠節

三十五

甚贈太子太保諡曰忠賜其家實戶二百一子五品正員官京師平官庀其葬子士渠開成初爲江西觀

察使

新唐書本傳

元

郭嘉字元禮濮陽人祖昂父惠俱以戰功顯嘉慷慨有大志始由國子生登泰定三年進士第授彰德路林州判官累遷翰林國史院編修官除廣東道宣慰使司都元帥府經歷未幾入爲京畿漕運使司副使尋拜監察御史會朝廷以海寇起欲於溫台慶元等路立水軍萬戶鎮之衆論紛紜莫定擢嘉禮部員外郎乘驛至慶元與江浙行省會議可否嘉至首父

老知其弗便請罷之會方擇守令綏靖遼東乃授嘉
廣寧路總管兼諸奧魯勸農防禦屬盜起軍旅數興
供餉無虛日民苦和糴轉輸而吏胥得因時爲奸嘉
設法計其戶口第其甲乙民甚便之有詔團結義兵
嘉招集民數千教以坐作進退萬千百夫各統以長
號令齊一賞罰明信故東方諸郡錢糧之富甲兵之
精稱嘉爲最十八年寇陷上京嘉聞之躬率義兵禦
之旣而遼陽陷嘉將衆巡邏去城十五里遇青號隊
五百餘人給言官軍嘉疑其詐俄果脫青衣變紅嘉
出馬射賊分兵兩隊而夾攻之生擒賊數百死者無
算嘉見賊勢日熾孤城無援乃集同官議攻守之計

開州志

卷之六

人物 忠節

三十六

衆皆失措嘉曰吾計決矣因竭家所有衣服財物犒
義士以勵其勇敢且曰自我祖宗有勲王室今之盡
忠吾分內事也况身守此土當生死以之餘不足恤
矣頃之賊至圍城亘數十里有大呼者曰遼陽我得
矣何不出降嘉挽弓射呼者中其左頰墮馬死賊稍
引退嘉遂開西門逐之賊大至力戰以死事聞贈崇
化宣力效忠功臣資善大夫河南江北等處行省左
丞上護軍封太原郡公諡忠烈

元史
本傳

伯顏一名師聖字宗道哈刺魯氏隸軍籍蒙古萬戶
府世居開州濮陽縣伯顏生三歲常以指畫地或三
或六若爲卦者六歲從里儒授孝經論語卽成誦早

喪父其兄曲出買經傳等書以資之日夜誦不輟稍長受業宋進士建安黃坦坦曰此子穎悟過人非諸生可比因命以顏爲氏且名而字之焉久之坦辭曰余不能爲爾師羣經有朱子說具在歸而求之可也伯顏自弱冠卽以斯文爲己任其於大經大法粲然有覩而心所自得每出於言意之表鄉之學者來相質難隨問隨辨咸解其惑於是中原之士聞而從游者曰益衆至正四年以隱士徵至京師授翰林院待制預修金史旣畢辭歸已而復起爲江西廉訪僉事數月病免及還四方之來學者至千餘人蓋其爲學專事講解而務眞知力踐不屑事舉子詞章而必期

開州志

卷之六

人物 忠節

三十七

措諸實用士出其門不問而知其爲伯顏氏學者至於異端之徒亦往往棄其學而學焉十八年河南賊蔓延河北伯顏言於省臣將結其鄉民爲什伍以自保而賊兵大至伯顏乃渡漳北行邦人從之者數十萬家至磁與賊遇賊知伯顏名士生刦之以見賊將誘以富貴伯顏罵不屈引頸受刃與妻俱死之年六十有四旣死人或剖其腹見其心數孔曰古稱聖人心有七竅此非賢人乎乃納心其腹中覆牆而揜之有司上其事贈奉議大夫僉大常禮儀院事諡文節太常諡議曰以城守論之伯顏無城守之責而死可與江州守李黼一律以風紀論之伯顏無在官之責

而死可與西臺御史張桓並駕以平生有用之學成
臨義不奪之節乃古之所謂君子人者時以為確論
伯顏平生修輯六經多所著述皆燬於兵

元史本傳

明

劉為衡字鑑寰萬厯戊午領鄉薦授泗水令調繁陽
有惠政遷揚州同知旋請告歸崇禎甲申聞李賊陷
京師毒拷諸縉紳前驅至開為衡慨然曰吾始終受
國厚恩義不苟免且居官無長物誓不以身受辱乃
坐土穴中自蔽而死

錄舊志

董琬初名琬尚書漢儒仲子也讀書有志節弱冠入
庠試優等食餼以父廕由官生授戶部主事歷陞河

開州志

卷之六

人物 忠節

三十八

南司郎中擢慶陽知府崇禎十六年闖賊陷慶陽琬
與兵備副使段復興同時死難事聞未及贈卹我

朝乾隆四十一年

特詔追錄勝朝殉節諸臣為琬立傳

賜謚節愍

琬綏寇紀畧
作知寧州誤

何大陸字叔作劉貫寨莊人庠生倜儻善騎射崇禎
十七年流賊至大陸率義兵往擊深入賊壘遇害妻
杜氏聞之亦自縊死葬本莊之北里許墓至今猶存
孟國石密城人少有膽畧鄰里傾服明季濮寇張七
虜致之逼降不從遂被害子逢源負幼弟避亂河南
賊平偕歸殷勤訓督得列膠庠鄰居凡六姓各給莊

基廣八步袤五十二步地五十畝惟崔姓無後李張秦陶王五姓皆感德不置云

文苑

漢

張恭祖東郡人鄭元嘗從恭祖受周官禮記左氏春秋韓詩古文尚書

見漢書鄭元傳

晉

成公簡字宗舒東郡人也家世二千石性朴素不求榮利潛心道味罔有干其志者默識過人張茂先每言簡清靜比楊子雲默識擬張安世後爲中書郎時周馥爲司隸校尉遷鎮東將軍簡自以才高而在馥

開州志

卷之六

人物 文苑

三十九

之下謂馥曰楊雄爲郎三世不徙而王莽董賢位列三司古今一揆耳馥甚慙之官至太子中庶子散騎常侍永嘉末奔苟晞與晞同没

晉書本傳

宋

周長孺字士彥爲衛州共城令師事邵康節受先天之學長孺性剛遇事輒發旣從先生卽淡然若無意于世者其季弟直孺怪而問之慨然曰此吾得于先者在共城獵有兔起草間自射中之卽其處不復見兔有石刻其文曰士彥當都而卒治平末以都官員外郎知劔州普城縣卒喪歸貧不能葬康節留其家經紀甚備教其子純明以學問爲娶程伊川先生

之姪後登元祐三年進士長孺生平著作甚夥後經兵燹多散佚不傳學者惜之

王端朝澶淵人過江愛溧水風土因家焉少以該洽聞年未弱冠建康鄉舉第一及入太學又爲第一再中博學宏詞科歷太學錄秘書省正字終知永州

明

劉矩字仲方永樂辛丑第二人及第矩殿試已列第一會帝夢有鶴上殿簡卷得曾鶴齡遂置第一以矩次之授翰林院編修遷修撰矩方正古樸有至行學問宏深以明道橫渠爲準範平生未嘗失口于人爲文溫醇典雅酷類南豐以病歸卒

開州志

卷之六

人物 文苑

四十

王循古字宗一潛心理學不事舉業齋居十年著五經圖說及帝王憂世心法諸圖說獻世宗下大臣議共奏曰此理儒也賜處士號以旌之並下所司修明道書院以教授生徒

吉惟善少穎悟過人性恬淡進退雍容有儒者風邃于性理之學不事舉子業永樂中以經明行修舉辭不就有司敦請署州學事端方整肅言動不苟後學宗之年八十有三卒

晁璫字君石別號春陵性至孝少失恃奉繼母以孝聞及長博極載籍工詞賦嘉靖辛丑登進士選庶吉士授檢討以父疾疏懇歸養父卒服闋陞洗馬旋授

國子監司業性行端雅文藻雄傑爲館閣所重平生慕賀監高風更號鑑湖所著有鑑湖文集晁氏足徵錄卒祀鄉賢子東吳字叔泰弱冠登進士選庶吉士文追秦漢尤善摹古法書父子濟美士林榮之年二十三移疾歸卒

韋秦字大秦十歲通經史十五遊郡庠試輒冠其曹詩古文詞矢口而成天啟辛酉領鄉薦海內名士無不交歡尤善書時張蓬元撫畿南延八幕其所撰著人共珍之年止強仕卒

王嗣虞字砥柱王氏故盛科名其子弟皆務舉子業而嗣虞獨好爲古詩歌及長博極羣書明天官家言

開州志

卷之六

人物 文苑

四十一

精究古今昏旦測候又以西洋法覈七政行度不失分寸著書數卷行世用明經薦入禮部適有慶賀事尙書當具表倉猝不得立代草上之帝嘉賚尙書重其才言之冢宰謁選知清源縣居官但據案嘯咏而縣事亦理會忤直指使者被劾罷歸益肆力於篇章當道憐其才欲薦起之嗣虞以詩謝社交遊放浪山水間文集多散見他帙

吉贄字幼輿少通經史入國學天啟中詔纂修神宗光宗兩朝實錄贄以善書供事實錄館書成吏部具題准貢丙寅授平陽府通判署臨晉縣復攝蒲州府事境內多強宗大姓法泥不行贄立意振刷積習一

變後復委署臨汾時功令禁委署嚴甚部使者移檄曰吉別駕賢者毋以例拘也會御史與選部構隙波及之遂拂衣歸杜門著述家徒壁立晏如也凡古今詩歌篆籀楷書無不究心所著有渡春閣燕市草隸篆分韻易經滌說諸書

以上錄舊志

國朝

郭丕修字懋昭八公橋人好學家貧年十三入庠踰年卽食餼咸以神童目之奇於遇屢薦不售康熙戊辰貢於太學教授生徒成名者甚衆後選授蓋平訓導未赴任卒

李汝魯字鈍菴土嶺頭人庠生博通經史立志孤高

開州志

卷之六

人物 文苑

四十二

家貧授徒作易經講義藏於家

李經字六子庠生嗜學好古尤長詩賦有詩稿行于世

郭天秩字惇五在城人幼穎悟弱冠入庠試輒冠軍乾隆壬午舉於鄉授容城教諭在任七載訓課士子成名者甚衆

林誼馬羨莊人歲貢生篤學力行至老不倦其訓人也先德行而後文藝門弟子成名者甚衆鄉人推重之

董世祿字功長胡邱人選貢生博學能文屢薦不售選授連州州判以老辭不就著作甚多藏於家

史琢章字存質家貧篤學年三十聞安溪李文貞公督學順天始應試一試卽售旋以優等冠諸生得食餼文貞公異其才以大成期之而琢章不喜仕進終身未入秋闈肆力周程張朱之學後貢入太學以老疾卒

段連芳廩膳生累世行端望重爲人矜式連芳學優善誘成就多士嘉慶三年合州紳耆追慕之以七世儒宗匾其門

史丕緒字經綸篤志力學家赤貧卽庭爲圃身自灌溉以餬口年老無子夫婦僦居一室不足蔽風雨吟嘯自如

開州志

卷之六

人物 文苑

四十三

龐乘雲艾家莊人敏而好學早歲入庠試輒冠軍督學李文貞公奇其才聘入幕校閱獨遲文貞公詢之日學使者三年一校士子雖學業未充未能全璧其中寧無一二語可取者草率看過負伊苦心不安也文貞嘉嘆之生平文多曲折奧衍有謂其不利場屋者曰吾自因題爲文場屋利鈍不足計終以歲貢選鉅鹿訓導居官以廉介稱

王企曾字紹宗廩膳生進士僧慧孫也幼隨祖任博獵經史及壯遊學江南善詩賦旋里後於里中知名士結詩社

喬茂字榮先早歲入庠歲試督學倪少宗伯首拔之

詢于學官知立品端方以匾旌之送入蓮池書院能
文士爭與交數奇屢試不售旋里授徒成名者甚衆
溫進選溫家型堦人增廣生立品端方好學不倦從
遊者多所成就有司旌其門

任鉞字體坤歲貢生志潔行芳有古人風嚴寒盛暑
手不釋卷人稱好學焉

宋挺字立齋歲貢生博學能文善誘生徒凡有講授
必留餘以待其思遊其門者多所裨益

武功

五代梁

賀瓌字光遠濮陽人也曾祖延以瓌貴贈左監門上

開州志

卷之六

人物 武功

四十四

將軍祖華贈左散騎常侍父仲元贈刑部尚書瓌少
倜儻負雄勇之志遇世亂入軍朱瑄爲濮州刺史兼
馬步軍都指揮使拔爲小將唐光啟初鄆州三軍推
瑄爲留後以瓌爲馬步軍都指揮使表授檢校工部
尚書及瑄與太祖構隙瓌受瑄命數領軍于境上乾
寧二年十月太祖親征兗鄆十一月瑄遣瓌與太原
將何懷寶率兵萬餘人以援朱瑾師次待賓館斷我
糧運太祖偵知之自中都引軍夜馳百餘里遲明至
鉅野東與瓌等接戰兗人大敗瓌竄于棘塚之上大
呼曰我是鄆州都將賀瓌願就擒幸勿傷也太祖聞
之馳騎至塚前遂擒之并獲何懷寶及將吏數十人

狗于克壁之下悉命戮之唯留瓌一人釋縛責之麾
下尋署爲教練使奏授檢校左僕射瓌感太祖全宥
之恩私誓以身報國天復中預平青州王師範以功
授曹州刺史兼先鋒都指揮使加檢校司空天祐二
年與楊師厚從太祖平荆襄授荆南兩使留後未幾
徵還爲行營左廂步軍都指揮使開平二年十月授
左龍虎軍馬步都指揮使十二月改左衛上將軍充
六軍馬步都虞侯三年五月轉右龍虎統軍未幾加
檢校司徒邢州團練使四年二月改澤州刺史充昭
義軍節度留後檢校太保進封開國侯乾化二年七
月授相州刺史尋加檢校太傅有頃轉左龍虎統軍

開州志

卷之六

人物 武功

四十五

貞明二年慶州爲李繼陟所據瓌以本官充西面行
營馬步軍都指揮使兼諸軍都虞侯與張筠破涇鳳
之衆三萬下寧衍二州三年秋慶州平十二月瓌以
功授滑州宣義軍節度使依前檢校太傅加同平章
事尋授北面行營招討使四年春晉人取楊劉城據
之八月瓌與許州節度使謝彥章領大軍營于濮州
之行臺村對壘數月一日晉王以輕騎挑戰瓌與彥
章發伏兵奮擊晉王僅以身免先是瓌與彥章不協
是歲冬十二月復爲諸軍都虞侯朱珪所構瓌乃伏
甲士殺彥章及濮州刺史孟審澄別將侯溫裕等于
軍以謀叛聞是月瓌與晉人大戰于胡柳陂晉人敗

績臨陣斬晉將周陽五旣晡瓌軍亦敗五年春正月
晉人城德勝夾河爲柵四月瓌率大軍攻其南柵以
艤艫戰艦扼其中流晉人斷我艤艫濟軍以援南柵
瓌退軍于行臺尋以疾卒時年六十二詔贈侍中長
子光圖仕後唐爲供奉官

舊五代
史本傳

五代周

趙暉字重光澶州人也弱冠以驍果應募始隸於莊
宗帳前與大梁兵經百餘戰以功遷馬直軍使同光
中從魏王破蜀命暉分統所部南戍蠻陬明宗卽位
徵還授禁軍指揮使晉有天下叅掌衛兵從馬全節
圍安陸佐杜重威戰宗城皆有功改奉國指揮使開

開州志

卷之六

人物 武功

四十六

運末以部兵屯于陝屬契丹入汴慨然有憤激之意
及聞漢祖建義于並門乃與部將王晏侯章戮力叶
謀逐契丹所命官屬據有陝州卽時馳騎聞于漢祖
漢祖乃命暉爲保義軍節度陝虢等州觀察處置等
使漢祖之幸東京路出于陝暉戎服朝于路左手控
六飛達于行宮君臣之義如舊結焉旋加檢校太尉
乾祐初移鎮鳳翔加同平章事屬王景崇叛據岐山
及期不受代朝廷卽命暉爲西南面行營都部署統
兵以討之時李守眞叛于蒲趙思綰據于雍與景崇
皆遞相爲援又引蜀軍出自大散關勢不可遏暉領
兵數千數戰而勝然後塹而圍之暉屢使人挑戰賊

終不出乃使千餘人于南城一舍之外環甲執兵僞
爲蜀兵旗幟循南山而下詐令諸軍聲言川軍至矣
須臾西南塵起城中以爲信乃令數千人潰圍而出
以爲應援設伏而待一鼓而盡殪之自是景崇膽破
不復敢出明年春拔之加檢校太保兼侍中國初就
加兼中書令三年春拜章請覲詔從之入朝授歸德
軍節度使顯德元年受代歸闕以疾告老授太子太
師致仕進封秦國公尋卒于其第年六十七制贈尚
書令

五代
舊史本傳

明

周武開州人從定江東滅漢收淮東平吳積功爲指

開州志

卷之六

人物 武功

四十七

揮僉事從定中原進都督僉事洪武十一年以叅將
從沐英討西方朶甘功多師還封雄武侯祿二千石
世指揮使出理河南軍務巡撫北邊二十三年卒贈

汝國公諡勇襄

錄明史
本傳

國朝

傅鵬翔武舉人康熙十年授浙江紹協左營守備十
三年奉調勦閩逆多斬獲功陞平陽鎮標右營遊擊
十四年八月防守姜家山逆賊偷渡劫營斬賊獲械
十五年攻克石塘恢復雲和龍泉慶元松陽等處招
撫僞叅將等六十餘員兵三千餘名招撫瑞安平陽
二縣授劄僞遊擊都司守備千把等官共二百一十

八員兵一千三百九十餘名十八年叙功加參將管
遊擊事尋陞江南吳淞營參將加副將銜二十四年
擢雲南副將二十九年加都督僉事調廣東雷州副
將以功晉提督銜以老告歸卒于家
常圖泰字懷尼進士時泰之兄也生而魁梧善騎射
矢無虛發明知州董象恒知其能後陞閩中遭寇亂
請圖泰往赴之寇以平
國朝定鼎初州境猶多盜圖泰嘗從參將土國寶勦滅之
後國寶巡撫江蘇奏授青浦守備屢著功績
卓行

南宋

開州志

卷之六

人物 卓行

四十八

吳慶之字文悅濮陽人也寓居江興宋江夏王義恭
爲揚州召爲西曹書佐及義恭誅慶之自傷爲吏無
狀不復肯仕終身蔬食後王琨爲吳興太守欲召爲
功曹答曰走素無人世情直以明府見接有禮所以
奔走歲時若欲見吏則是蓄魚於樹棲鳥於泉耳不
辭而退琨追謝之望塵不及矣

宋書
本傳

隋

華秋汲郡臨河人也幼喪父事母以孝聞家貧傭賃
爲養其母遇患秋容貌毀悴鬚髮頓改州里咸嗟異
之及母終之後遂絕櫛沐髮盡禿落廬於墓側負土
成墳有人欲助之者秋輒拜而止之大業初調狐皮

郡縣大獵有一兔人逐之奔入秋廬中匿秋膝下獵人至廬所異而免之自爾此兔常宿廬中馴其左右郡縣嘉其孝感具以狀聞煬帝降使勞問表其門閭後羣盜起常往來廬之左右咸相誡曰勿犯孝子鄉人賴秋而全者甚衆

錄隋書本傳

唐

李文綢臨河人事親孝居喪盡哀以孝聞于朝野

宋

杜瑩字德溫澶州人贈大理寺丞爲人孝友謙恭以清淨爲學淡泊自足壽八十子宗誨爲襄陽簽書節

度判官

以上錄舊志

開州志

卷之六

人物 卓行

四十九

明

侯春永樂辛丑進士授御史轉浙江按察副使有孝行免喪後猶廬墓七年族孫恭人稱清吏亦有孝行侯英字世傑天順庚辰進士授御史按遼東劾中官四方想望風采歷官都察院副都御史與弟侃俱以孝稱居母喪與侃同廬墓側有白鳥數千旦久飛鳴墓前人以爲孝感所致云成化中旌表

以上錄舊志

馬宗範國子生官都察院檢校父喪廬墓盜不敢犯

宏治中旌表

錄一統志

甘澤號東閭性純孝幼時卽如成人登正統壬戌進士授行人擢御史以劾武清侯石亨謫常熟知縣識

吳寬于諸生中歷陞廣西副使又謫滁州天順改元
召還至張秋聞父計痛哭絕而復蘇徒跣三百餘里
歸葬與弟潤俱廬墓三年澤卒潤居母郝喪亦廬墓
三年宏治中並旌表

劉珂字伯瑄少孤事母至孝登嘉靖癸未進士未授
官卽上疏乞終養呂柟雅重之贈以詩有曾子終能
傳一貫孝經眞脉未嘗差之句旣歸里足不履公庭
定省之暇惟授徒講學母卒哀毀骨立服除授刑部
主事歷郎中以廉平著聲時有貴戚犯法諸司無敢
按者尙書以委珂珂立爲判決卒無異議尋擢陝西
僉事勞績甚著上特勞以金帛轉本省副使致仕歸

開州志

卷之六

人物 卓行

五十

吉陳字萬言處士惟善之孫幼有至性少孤奉母孝
正德乙卯舉于鄉謁選授河州知州轉趙鄭兩王長
史多所匡益爲王所禮世宗時王以直諫忤旨廢錮
陳亦歸鄉恂恂敦長者行食不重肉一褐十年不易
子澄孫大同皆以進士起家官御史行人歸省出入
里門不許乘肩輿時論賢之
李師孔嘉靖己未進士陳情乞養壬戌殿授行人生
平篤於倫理薄宦情有逸民風卒祀鄉賢
任勉字進學性至孝品行端方養親以禮未嘗違於
色居父喪廬墓三年弟子執經問難者百餘人里中
悍戾化爲善良有司以聞詔旌表焉

張鼎字重器貢生天性純孝自成童至強仕未嘗一日離親側父歿哀毀骨立廬墓三年寢苦枕塊常如袒括時墓去戚城大路東一里許林深地僻鼎每泣奠哀聲徹行路有司以聞立坊旌表

劉陳策有孝行里人推重有司旌其門

郭光煥天性至孝能以色養閭里式慕有司旌之後入祀忠義孝弟祠

李嘉猷字順卿郡學生天性孝友善承親意讓產於兄弟推有餘以濟鄉黨所居茅舍不蔽風雨學使者異其行旌之尚書董漢儒爲立傳

以上錄舊志

施程北道期莊戶部寨人事親以孝聞父母歿廬墓

開州志

卷之六

人物 卓行

五十一

三年

安車聘在城南大街人事親孝有司以聞建坊旌表
陳章州城清河街人孝事父母有司以聞立坊旌表

國朝

盛期字述魯中崇禎癸酉鄉試性恬淡不嗜榮利鄉居授徒自給流賊陷京師僞官至州逼謁選不起禍且叵測期不爲動

國朝定鼎初直指使某期同年友廉其貧餽數百金卻不受李化鯨據曹縣圍東明賊騎充斥經所居曰此盛孝廉莊也相戒勿入賴期全活者甚衆年八十以疾

卒

徐文進性至孝父卧病家貧甘旨不給割肉以進父歿號泣不食者三日拮据營葬結廬墓傍朝夕負土積三歲始成塚闔里皆稱其孝州孝廉王琛爲之記有司以聞奉

旨旌表入祀忠義孝弟祠

以上錄舊志

羅帝臣習城莊人廩膳生天性友愛年逾五十猶應童子試康熙五十四年州府考列前茅學使按臨適帝臣兄歿親隣勸之試帝臣曰予雖年老安有兄喪未寒而急急求名者耶終不出

宋維坦字平也康熙辛卯副貢敦倫飭紀制行高潔鄉黨共稱之

開州志

卷之六

人物 卓行

五十二

夏文法楊村莊人雍正二年鄉舉孝廉有司旌其門李連登字瀛洲性至孝父早逝以不逮養爲終身恨事母敬養備至及歿哀毀骨立寢苦枕塊者三年不肯易性復好施雍正八年歲薦饑出粟濟衆人甚德之

谷琦字上璧高廟莊人附監生性恂謹事親至孝尤好施予值歲歉佃戶欠租無以償悉不問雍正庚戌辛亥歲大饑琦散粟給族黨中之貧乏者人甚德之乾隆十五年有司紀其名於彰善坊復上其事奉旨入祀忠義孝弟祠并給銀建孝義坊

何起鳳八公橋人恩貢生有孝行鄉里公舉乾隆初

有司旌其門

何宗文字駿聲劉貫寨莊人武庠生父患心疾撫摩數十晝夜不倦母病風痺一載朝夕侍側未嘗離左右兄歿撫侄如子里黨胥賢之性復好施周貧乏恤鰥寡族黨而外待以舉火者甚衆劉孟曼吳任李數姓且藉以成家鄰邑有貧不能葬者予之地不少吝乾隆三十四年學使者旌其門

白廷禎小屯莊人父母歿殯葬盡禮廬墓三年

竇宏功竇家莊人武庠生事親至孝父病八載宏功日夜不離側及沒哀毀盡禮鄉里稱之

宋維仁字惠子庠生品行高潔倫理克敦諸弟貧不

開州志

卷之六

人物 卓行

五十三

能學者得所助而成名焉

王崇王字尊周少孤事母以孝聞賦性耿介不可干以私後以壽卒

孫緒武孝友性成事父母能先意承志撫育幼弟教養兼至族中貧乏者數周恤之稱厚德焉

高繼賢韓村莊人事親孝父中年得癱疾坐卧飲食需人繼賢日夜奉侍扶持抑搔絕不令人代十餘年父歿哀毀骨立三日勺水不入口居喪三年未嘗見齒鄉里賢之

吳方振樂村莊人事父母以孝聞友於兄弟內外無間言有司旌其門

谷琛高廟莊人恩貢生性至孝事父母子職靡不盡
每遇先忌必親詣祖墓設奠久而不懈鄉里賢之
谷鳳翱字千仞高廟莊人庠生賦性孝友事父母克
盡子職以詩書課諸弟後鳳毛領鄉薦鳳彩鳳正列
膠庠造就之方半由家督云

周偉習城莊人家貧務農事父母盡孝兄弟析產偉
以已所分莊基留其半餘盡與之兄弟有負欠偉解
囊償之無難色有司旌其門

郭若璘字萬錦庠生孝行純篤紳耆公舉學使者旌
其門

劉保東字道長增廣生事親至孝父母疾視膳嘗藥

開州志

卷之六

人物 卓行

五十四

朝夕不懈能爲隣里排難解紛人服其德

劉倫居州治東劉家拐兄弟七人事父母能順其意
待兄弟無間言有司旌其門

劉宗孟朔村人父早亡祖父年九十餘每食非肉不
飽宗孟親自供膳以悅其意及沒日夜流涕以哀毀
卒

吳方振大桑樹人天性孝友父霄暮年患瘋疾方振
百計醫治焚香默祝願減已算以却父疾母病常數
日不食疾愈食乃下咽有弟三人雖析居時以已資
周其貧乏云

萬良弼大桑樹人伯母孫孀居雙目失明子良佐就

食遠方良粥迎孫氏于家奉養三十餘年敬禮不衰
陳錫勇井店人持躬謹厚事父母能得歡心父歿後
歲時伏臘必至墓哭泣逾老不衰

陳化新州東田村莊人庠生賦性醇篤父得癩癘疾
化新奉侍左右日夜未嘗離四十餘年如一日邑人
議舉其孝化新聞之惶然曰事親者人子之常分敢
以此要譽耶固却之

程崇建太學生家貧守禮善居喪鄉里矜式焉

潘元會性至孝家貧無以爲養傭於人取其直以爲
供奉資母病日夜扶持三年未嘗解衣卧母歿後終
身不食甘旨

開州志

卷之六

人物 卓行

五十五

喬福天性孝友事父母能得歡心父有疾三年牀褥
中福奉侍湯藥不少懈既歿喪葬盡禮弟祿貧甚同
居數十年無間言暮年謂弟曰吾老矣田產吾所自
置擇美者畀汝無使子孫紛爭也鄉里賢之

郭名駒性孝友能善體父志父再娶而鰥弟妹幼名
駒撫之成人婚嫁悉如禮父歿哀毀骨立族黨稱之
孟宗曾密城莊人候選州同知事親孝父歿廬墓三
年

張鵬史軍莊人少失恃無耦父子相依家貧甚賣菜
鄉曲間歸必買父所嗜者以供甘旨後父患風痺卧
牀褥間六載鵬日夜奉侍無少懈鄉人憐其苦醵金

爲娶婦稍分勞焉有司給匾旌之

尹孝夾壩莊人太學生事親孝叔無子以孝爲嗣祖遺地八頃孝嗣叔應得半慮兄弟不給於用乃均分之孝兄析居產日落奉養于家以終老有婦人被人誘奔己而悔匿園中孝見而詢之婦泣言家有夫且有子欲回無計得脫孝使作乞丐狀與路費令速行無知者其厚德類如此有司給匾旌之

許文燦主布村庠生事繼母孝母性嚴有小故輒鞭之文燦惟順受必侍母怒患而後去事無大小悉稟命而行父母歿居喪盡禮旣葬事之如生閭黨賢之許惟謙黃濱莊人廩膳生事親孝父母歿寢苦枕塊

開州志

卷之六

人物 卓行

五十六

喪葬盡禮有司旌其門

程傑張壩集人事母孝爲人傭得值奉母一日出耕饑暈于道扶歸甦恐傷母心曰兒偶得時病無慮也兄俊嗜酒傑不因貧而有間言後俊感悟終身戒飲靳應用八公橋人性純孝事父母先意承顏終身不懈及歿喪葬胥如禮里人稱之

劉倫柳下屯人父早亡事孀母克順其志兄弟友愛四十餘年同居和好庭無詬誶聲

周宏緒習城人太學生父卒數月而宏緒始生事母孝兄嫂早亡遺侄方一歲宏緒撫若己子性端方不苟取有吳姓欲出千金與合夥囤積宏緒曰此瘠人

肥已之事吾弗爲也其人敬服而去

李盛烈性至孝年十四父患癱疾盛烈奉事五年日夜不離側父歿事繼母謹甚聞咳唾聲雖夜分必起衣冠侍立達旦繼母有弟貧甚破產周之不少吝閭黨稱之

谷呈祐紅綾莊人庠生友孝性成事父母能色養居喪哀毀骨立兄早逝撫幼侄如子叔乏嗣呈祐以次子承其後叔所遺產仍與兄弟推分之

史克勤掘地莊人庠生事親孝年十五遭母喪哀毀骨立水漿不入口者數日父謂曰吾在爾奈何至是克勤始惕然勉食粥殯葬悉如禮後父寢疾躬侍湯

開州志

卷之六

人物 卓行

五十七

藥衣不解帶者累月每夜焚香祝天願以身代父歿貧弗克葬停柩于室寢苦枕塊日夕哀號百日後始就館側席據地而坐與門弟子講論言及父子之恩未嘗不流涕服除逾年卒聞者惜之

周蓮字清馥號淨亭廩膳生事親以孝聞母病數年不起蓮奉事無少懈後父患瘡疾蓮日夜不離側性尤仁厚嘗自京應試歸遇嬰兒於路卽下車抱之行三百里有老人無嗣求以爲嗣蓮乃與之後有司旌其門子家瑞字鳳鳴早歲八庠屢薦不售以選貢終梁得山家貧甚母病思肉得山割股以奉母病尋愈有司旌其門

李世德黃甫莊人繼母病欲食肉世德自割肩肉以進病遂愈後父病又割肉以奉之人稱其孝

張漢儒鐵邱人家貧甚母病亟思食肉貧無以市割臂肉爲羹母食之竟愈傷處亦無患人稱其孝

王文素夾埭莊人幼喪母事繼母至孝繼母有疾數日不食忽思肉時亢旱禁宰殺文素私割股肉一片令婦烹以進母病尋愈

按割肝剖股本非純孝是以

令甲所載原無

旌表之條然愚忠愚孝出於至誠亦未嘗不可以風厲薄俗茲以梁得山四人附於卓行之末用以示善

開州志

卷之六

人物 卓行

五十八

善從長之義云爾

義行

元

楊崇喜國子生本唐兀氏博學好義至正末中原多事兵食方急崇喜輸米五百石草萬束以助國用而不求名爵創建廟學養士割良田五百畝贍之朝廷以其事下中書賜名崇義書院

明

劉禮清河里人成化間京師饑饉軍民逃亡禮輸米

百石于官詔旌其門曰義民之家

以上錄舊志

王實太學生大桑樹莊人生平勇於爲善鄉里咸德

之有司旌其門

張英在城清河街人尚義好施有司立坊旌之

國朝

張玉河字振泉性慷慨好施予每歲設塾延師自具薪米以待里中之貧學者康熙中有司旌其門

郭鳳翹字丹山八公橋人增廣生生平慷慨好施康熙甲寅歲館歸途遇旅人李思成夫婦卧雪中垂死詢之乃老儒無子偕與俱歸贍養數年既死爲殯殮清豐張某初爲奴察其才教以書算使就商後張既富乃歸籍清豐丙子就試大名里有常姓蒙冤鳳翹挺身救之卒得白所著有先後天八卦註釋續定三

開州志

卷之六

人物 義行

五十九

元通書四卷藏於家

周輔魯東南鄉人性好施里西有老君堂棟宇傾圮輔魯捐資倡修乾隆丙午歲大飢輔魯出粟濟衆臨終出積年借券悉焚之感德者甚衆

張鉉東大張莊人性好施予每歲延師家塾遇才之可就者周其衣食並贍其家因以成名者甚衆時譽歸之

李可方胡壯集人三遇荒年散財濟衆里中貧不能葬及婚嫁失時者悉攸助之人稱厚德焉

李新德北道期莊人太學生少孤依兄以居析爨時財產讓兄多取族中有無所歸者生養死葬身獨任

之鄉鄰有鬪者得片語卽解遠近稱之

宋沂維仁子字浴曾太學生飭紀敦倫憐窮困樂施予有乃父風有司紀其名於彰善坊與谷琦羅帝臣並旌州判周廷高有樂善序紀其生平懿行甚詳

王輔欒村莊人和厚好施予里中貧乏者恒衣食之歲飢獲竊其稼者縱之去羣推爲長者

安福團塆莊人性好施里中婚喪無力者多伙助之嘗置地三畝爲義塚一鄉之內無暴骨焉

張盡忠字蓋臣國學生樂善好施里中貧學者月給薪米養贍之里中競呼爲張善人

楊呈祥十八郎村人國學生性孝友嘗讓產于兄值

開州志

卷之六

人物 義行

六十

歲侵出粟賑飢鄉人賴焉

李懋修北道期莊人郡庠生值歲侵買劉氏女爲婢數年其父求贖還其女不受值且厚予之中表黃某最貧養贍之及卒備衣棺殯葬胞弟早世撫二姪如子延師教讀得列膠庠鄉里共推重之

韓希賢北昌湖人國學生慷慨好義與世無忤鄉人重之

孫緯倪家寨人性好施予有魏縣某因貧鬻女緯爲贖之本莊人高碧公貧不能娶解囊以贈又王召崔五等親歿無以殮助之棺里中稱爲長者

李昌裔字完樸例選州同知好施與拯饑寒每歲終

必儲錢粟以應貧乏之告貸者疾革時取借券悉焚之鄉黨推爲長者

陳鏊字和宸在城人父有養子鏊友愛如同胞父所遺貲產盡與之姑母適義井劉某貧甚劉亡子外出鏊養于家事之四十年如一日姑子歸始迎還其家嘗有竊夜以囊負粟去鏊彈之中囊囊破粟出鏊自後跡之得其門而歸家人固問之曰是閭巷貧人言之則終身不齒於人矣年飢親族就食其家者常數十人鏊待之無吝色鄉人共推重焉

李粹字太純庠生性好施尤喜拔單寒里人史琢璋貧而篤學粹令讀書家中每食與共迨琢璋成名始

開州志

卷之六

人物 義行

六十一

去戚屬王某祖父相繼歿與之棺并葬地後王某竊典之粹聞代贖以歸每歲暮煮粥以賑無告衣不蔽體者與之布或以舊衣遺之人高其義

孟廉庠生樂行善家設義塾以待無力延師者里中子弟多所成就

高智武祥屯莊人太學生族中及鄰里貧乏者多所周恤且善醫廣施方葯存活無算人有餽謝却不受子鶴林太學生克紹父業行亦如之五世同居設塾延師以待學者取益焉里中子弟賴以成名者甚衆卒之日一鄉黯然

郭天然胡莊人太學生樂善好施嘗散儲粟以濟困

乏延師開塾以成就里中子弟有婚喪無力者必加資助鄉鄰德之

馬克勤字懋菴中大郭莊人庠生家雖貧不苟取近族有絕產應克勤次子承嗣數年其姪欲與爭克勤卽全與之人多稱道焉

段豸冠字御彈庠生性孝友處鄉黨中排難解紛且好施與貧乏者多賴以全時論推之有司旌其門

竇儀字象可夾壩莊人太學生性樂施與助人婚喪几數十家其子寅申幼聘庠生王文齋女十歲目雙瞽王與置一媵儀力辭之又使另擇配儀日人倫大事豈因瞽目遂改易之耶卒爲子娶之江南有李姓

開州志

卷之六

人物 義行

六十二

者旅寄于開爲子聘定州人張祿女數年回里祿乘間賣女與儀爲婢後李返儀知之喚祿至令同領歸不索值復善岐黃術廣施方藥活人無算鄉人咸德之

郗冠世字方伯太學生好善樂施欠戶貧不能償者概置不問有族人買一女欲爲妾女不欲代償其值厚貲嫁之

耿元章團壩莊人性仁慈好施與死之日一鄉貧人無不垂涕

崔世有新城崔家莊人門臨衝道往來絡繹有悲失路者輒推解之無少吝行人歌頌之

孫金枝增廣生性和易處衆無忤里有爭者聞其言
卽解復好施子人高其德

溫宗文溫家型壩人品行端方排難解紛鄉里推重
有司旌其門

溫日昆溫家型壩人太學生性好施人稱善士有司
旌其門

李文振字如茲北道期莊人太學生重儒行好施予
設塾延師以教里中之貧學者多有成立有貧不能
婚葬者輒飲助之乾隆戊戌歲大飢里中貧乏欲逃
竄者五十餘家文振亟散貲周濟俱得安居至今德之
耆壽

開州志

卷之六

人物 義行

六十三

國朝

張振先史軍莊人年九十二歲子一人孫三人曾孫
三人元孫一人振先皆親見之

王懷智史軍莊人親見五代子三人孫七人曾孫五
人元孫一人

馬超倫樂村莊人子珠孫文芳曾孫考成元孫辰戌
五世一堂鄉里爭羨之

劉司昌義井莊人賦性愷悌好施予親見五代子繼
文孫芹曾孫喜祥元孫九齡人以爲厚德之報云

趙振宗義井莊人子璞玉孫思聰曾孫金樑元孫珂
振宗皆親見焉

王雨雷在城人年七十三歲子文煥孫樹亭曾孫千里元孫中秋五世同堂雨雷猶精神矍鑠云

王大方破車口村人親見五代子文龍孫盡孝曾孫珺元孫謙一堂雍睦人艷稱之

王樞後王郭村人太學生子孫曾元樞親見之有司以匾旌其門

耿崇宣大賢店人年八十有二子天相孫可祿曾孫國俊元孫敬修一門孝友鄉里稱之

李元勳西大郭莊人子大儀大儀子克勤克勤子遜志遜志子鑑鑑子本固本固子中立元勳皆親見焉

七世同堂尤爲罕觀

開州志

卷之六

人物 義行

六十四

王耀宗朔村莊人年九十有一祖毓龍父成章耀宗皆親事之子寅孫廷琳曾孫富元孫五輩曾元繞膝耀宗猶康強不衰云

張盡孝于林頭莊人太學生年八十有五祖廷秀父据盡孝親事之子謹孫鵬羽曾孫成德元孫麟七葉衍祥閭黨多稱道焉

孫學禮安樂村人子四人孫六人曾孫三人四世同居一堂雍睦鄉里稱之

寓賢

元

郭昂字彥高彰德林州人習刀槩能挽強稍通經史

工於詩至元二年上書言事平章廉希憲材之授山東統軍司知事尋改經歷遷襄陽總軍司轉沅州安撫司同知佩金符招降溪洞八十餘柵播州張華聚衆容山昂率兵屠之山猺木猫土獠諸洞盡降十六年以諸洞酋入朝帝賜金綺衣鞍轡進安遠大將軍徇沅州西南界復新化安仁二縣擒劇賊張虎縱之曰汝非吾敵願降耶來不然吾復擒汝不難也明日虎降併其衆三千餘人悉使歸民籍軍還衆歛白金以獻一無所受行至江陵衆復從致金而去昂悉上之行省宰臣令藏於庫以示諸將二十六年江西盜起昂討之進逼南安明揚上龍巖湖綠村石門鴈

缺

開州志

卷之六

人物 寓賢

六十五

赤水黑風峒諸蠻立太平寨而還會大飢以賊首

缺

文分賑之授萬戶賜金虎符鎮撫州未幾省檄赴廣

東監造戰船行至廣東界遇盜移檄諭以禍福廣東素服其威信及見其檄卽俱降授廣東宣慰使卒年六十一子震杭州路鎮守萬戶惠僉江西廉訪司事

豫知寧都州

錄元史本傳

韋平其先鄭州人祖意遷靈壁順帝至正十二年右丞相脫脫請親出師討賊詔得爵賞誅殺平應募屢以戰功封寧遠伯脫脫謫死後隨擴廓二十七年十月明太祖北定中原平家族在贊皇者俱殉難擴廓還沙漠平匿族譜逃至開州復娶馬氏生子遂家焉

全傳載藝文志中

國朝

土國寶遼東人崇禎十三年任大名營叅將有城守
功後破張光平李垵諸賊皆其力也十七年陞懷慶
府總兵

國朝歷官蘇松巡撫入州籍

錄舊志

白進寶字君重本姓劉原籍浙江山陰後因避難遷
山西大同府進寶少而英勇嫻於行陣明王指揮見
而奇之以女妻焉薦於副將白某屢立奇勲官至守
備

國朝順治元年叅將土國寶知其謀勇因召至大名勦土

開州志

卷之六

人物 寓賢 方技

六十六

賊張七榆等不踰月悉平遂留駐開州後援剿福建
土賊以軍功歷官至漳州府城守營副將在閩最久
復移山東文登營副將加都督僉事繼因攻破崑崙
招虎兩山加都督同知時康熙元年也十一年遷江
西南贛總兵旋值吳耿之變進寶躬率將士克全江
右以積勞不起卒於軍後葬開州小城村莊劉家隄
口
方技

元

郭大巨少遇異人授岐黃術與子隆俱以神醫名馳
齊梁燕趙晉魏間所醫無不立效

錄舊志

仙釋

晉

吳猛濮陽人少有孝行夏日侍母側手不驅蚊懼其去已而噬母也仕吳爲西安令得至人授以神方大行于時嘗見暴風大作書符擲屋上有青鳥啣去風卽止西安令子慶死已三月猛曰數未盡當訴之於天遂卧尸傍數日與尸俱起晉寧康中白日飛昇政和中封神烈真君猛女彩鸞傳父秘法太和末乘白鹿車遐舉而去

唐

道因姓侯氏濮陽人七歲詣靈巖寺祝髮求師講習

開州志

卷之六

人物 仙釋

六十七

不泐旬通涅槃經二帙衆以爲神童又于彭城受嵩法師大乘依科戒而有節文久之杖錫出山避難三蜀居多寶寺論維摩聽者千數時東海寶暹法師每聞因論肅然改容當路貴人咸申虔仰後赴京師大慈恩寺著涅槃華嚴維摩法華楞伽章疏數千言弟子元礙嗣其香火

元

郎眞人名志清字明道禹城人年十四遇異人托宿所談皆方外事又二年入道方悟其爲純陽祖師也泰和間至開居洪洋山復憇通眞觀羽化葬洪洋山劉妙成名志源師宗郎明道後遇長春師賜號清冷

子隱通真觀

明

王曰銓開州人生而記憶兩世事博通經史尤精於春秋後棄舉子業悉心內典大有元悟時或口占自述如蘆花兩岸雪江水一天秋鐵牛耕破扶桑國迸出金烏照海門人皆傳頌之號鮒鱒山人又號蓮舟居士萬曆十七年對人言明春當化去果應之所著有心經註疏金剛經註疏行世

善岩開州人姓宋氏少習舉業不就遂厭棄塵囂落髮州之雲峯寺能詩與縉紳相唱和徧遊終南五台武當諸勝還魏掛錫郡城普照寺建白雲窩繙閱經

開州志

卷之六

人物 仙釋

六十八

藏不窺庭宇定息十餘年一日示偈曰樹倒藤枯是去年了然無法與人傳雲收雨霽山嵐靜萬古長空一月圓遂坐化有翠峯詩集行世

瑤光和尙姓劉氏爲郡文學負時名好內典後祝髮不知所之末年始歸妻子求見絕不許凡達人高士皆樂與談禪今其塔在龍泉寺側

以上俱錄舊志

